



Ma vualtris parcè crodeiso che il nestri ustîr culi al si fasi vignî su chestis ideis di contecurte-day?

Us al spiegghi jo.

O vês di savê che, chê altre dì, al si à intopât intun orcul. Plui che intopât si podarès dî che al è colât a plomp dentri inte vuate dal orcul. Un orcul dut neri, cuntun cudin daûr de cope.

E i orcui, si sa, a son golôs di cjar umane, massime e se je cjar di ustîr.

Za pront par glotilu dut intune bocjade, ti conti une storie, al vosà a plene vôs l'ustîr, ti conti une storie, tant bieles che mai!

L'orcul cul cudin al jere un orcul a la buine e, va ben, contimi cheste storie, sintin.

Cussì par chê dì il nestri ustîr si le à suide.

E par altris trê, cuatri dîs al è rivât a imbastî storiis, ti conti ancjemò une, plui bieles di chê di îr! Ma... mighe nol jere Sherezade!

Al veve dibisugne di altris storiis, di altris contis.

Ealore al inventà i contecurtârs.

E ve ca che o sin.

Jo a butâ jù in presse e a scjafoion cheste robe chi, che no je nancje une conte, ma cuissà che no vèi di plasêi chel istes al ustîr. E che i le conti al orcul. E che l'orcul al sei di bocje buine e che le pari jù cence fâ il slichignôs.

Parcè che, l'orcul, lis contis lis mangje. Lis cruste, lis muart, lis glet.

Chest lu sai, lu savevin ducj.

Ma chel che nissun nol si veve impensât, al jere che, une volte finidis lis mil e une conte, al orcul, ancje se al à il cudìn, i ven ancjemò fan. E alore al mangje, al cruste, al muart, al pare jù... ce mangjal? Ce mangjaraial chest sfolmenât di un orcul cul cudìn?

Un par un, ducj i contecurtârs.

E veju i contecurtârs a vaî, a jesolâ che jo, jo o ai scrit dome par... cussì par... cence savê... no savevi che...t i prei sior orcul cul cudìn...

L'orcul cul cudìn al spacole il cjâf, al rugne, massì o sarai bon, un lu salvi, ma un sôl. Dome un. Cuâl?

Chel che al vinçarà il Contecurte Day dal 2017.

Al par chel che, vuê, mi tocje par fuarce vinci a mi!

Le veso capide, siors e sioris de jurie?

di Laurin Zuan Nardin